

佛說灌佛經一名灌洗
佛形像經

西晉沙門釋法炬譯

爾時佛告摩訶剎頭諸天人人民皆一心聽佛
言人身難得無為道亦然佛世難值吾本從
阿僧祇劫時身為白衣累劫積德每生自尅
展轉五道不貪財寶棄身施與無所愛惜自
致為王太子太子以四月八日夜半明星出
時生墮地行七步舉右手而言天上天下惟
吾為尊當為天人作無上師太子生時地為
大動第一四天王乃至梵天忉利天王其中
諸天各持十二種香和湯雜種名華以浴太
子太子得成佛道開現聖法濟度羣萌佛告
諸天人十方諸佛皆用四月八日夜半時
生十方諸佛皆用四月八日夜半時去家入
山學道十方諸佛皆用四月八日夜半時成

佛十方諸佛皆用四月八日夜半時入般涅槃
佛言所以用四月八日者以春夏之際殃
罪悉畢萬物普生毒氣未行不寒不熱時氣
和適正是佛生之日諸善男子善女人於佛
滅後當至心念佛無量功德之力浴佛形像
如佛在時得福無量不可稱數佛言我本行
菩薩道時三十六返為天王釋三十六返作
轉輪聖王三十六返為飛行皇帝諸有佛弟
子信心善意者當念十方諸佛功德善業以
香華雜物浴佛形像者所願皆得諸天龍神
常隨擁護皆當證明佛告諸弟子夫人身難
得經法難聞其有天人能自減損妻子之分
五家財物用浴佛形像者如佛在時所願悉
得欲求度世取無為道生生不與死會者可
得欲求精進勇猛如釋迦文佛者可得欲求

如文殊師利阿惟越致菩薩者可得欲求轉
輪聖王飛行教化者可得欲求辟支佛阿羅
漢者可得欲求離三惡道者可得欲求生天
上人間富樂者可得欲求百子千孫者可得
欲求長壽無病者可得世間人民貪欲如海
寧割身上一縷肉不肯出一錢物與人人生
時不持一錢來死亦不持一錢去財物故在
世間人死當獨去憶如此者乃浴佛形像持
是功德生死相隨無有斷期佛言若人有一
善之心作是功德者諸天善神天龍八部四
天王等僉然擁護浴佛形像福報九所生常得
清淨從是因緣得成佛道

佛說灌佛經